

UP BUSINESS

Udruženje
poslodavaca

Info Newsletter

U ovom broju čitajte:

- Udruženje poslodavaca FBiH u deset gradova FBiH održalo javne rasprave o Nacrtu zakona o doprinosima, Nacrtu zakona o porezu na dohodak i Zakona o porezu na dobit
- Inicijativom UPFBiH izmijenjena sporna odredba koja definiše vrijeme snabdijevanja poslovnih objekata u Kantonu Sarajevo
- Sastanak predstavnika UPFBiH i potpredsjednice FBiH o problemu plasmana hemijskih proizvoda u RS
- Sastanak sa premijerom o Zakonu o štrajku i Zakonu o zaštiti na radu
- Ministarstvo trgovine FBiH podržalo inicijativu Udruženja vezano za problem oznaka cijena robe
- Sastanak o dualnom obrazovanju
- Ministarstvo zdravstva FBiH podržalo inicijativu Udruženja poslodavaca za izmjenu Zakona o zdravstvenom osiguranju FBiH
- Sjednica UO Udruženja poslodavaca KS

Javne rasprave o Nacrtu zakona o porezu na dohodak, Nacrtu zakona o doprinosima i Zakonu o porezu na dobit

Polazeći od izraženih interesa za razmjenom mišljenja i potrebe da se ukaže na važnost donošenja provodivih, fleksibilnih i optimalno prihvatljivih zakona, Udruženje poslodavaca FBiH, Privredna komora FBiH, Vijeće stranih investitora i Privredno udruženje predstavnštva njemačke privrede u BiH organizovali su u deset gradova Federacije BiH **javne rasprave o Zakonu o porezu na dohodak, Zakonu o doprinosima i Zakonu o porezu na dobit.** Raspreve su odžane krajem oktobra i početkom novembra u Gračanici, Tuzli, Bihaću, Tešnju, Zenici, Travniku, Širokom Brijegu, Mostaru, Goraždu i Sarajevu.

Gračanica i Tuzla

Prve javne rasprave održane se u Gračanici i Tuzli 24. oktobra 2017. godine na kojoj su prezentovani amandmani i primjedbe



Udružnja na pomenute zakone.

"Ova tri zakona su sistemski važna za poslodavce i za stvaranje povoljnijeg poslovnog ambijenta, sa osnovnim ciljem rasterećenja privrede. No, ovako predložene zakonske izmjene to ne osiguravaju, te mi imamo prijedloge amandmana kojima će to biti zaista učinjeno." – istakao je Zlatan Dedić iz Udruženja poslodavaca FBiH



Analiza zakona je pokazala da je opterećenje rada u FBiH među najvećim u Europi. Stoga, Udruženje predlaže smanjenje stope doprinosa, kojim bi se pokrenulo novo zapošljavanje, smanjenje nezaposlenosti, povećala bi se potrošnja i omogućilo veće punjenje budžeta i vanbudžetskih fondova.

"Nacrt zakona predviđa smanjenje doprinosa sa 41,5 na 33 %, a mi smatramo da tī doprinosi

mogu biti još njiži da idu 30,0 posto", kaže Dedić.



Goran Stanojević (FIPA), javna rasprava u Gračanici

Goran Stanojević iz Agencije za unapređenje stranih investicija u BiH ističe da ni strani investitori nisu zadovoljni predloženim nacrtima zakona, te da je ukidanjem poreskih olakšica po osnovu izvoza sve teže privući strane investitore.



Javna rasprava u Tuzli

Učesnici na održanim javnim raspravama su iskazali da predložena zakonska rješenja trebaju biti prihvatljiva i za radnike i za poslodavce. Istakli su problem odlaska mladih i radne snage, ali i nemogućnost da se formira bolji poslovni ambijent zbog brojnih parafiskalnih poreza, loših zakonskih rješenja,

visoke opterećenja rada i destimulativnih Vladinih mjera prema privrednicima i investitorima.

BIHAĆ

U Bihaću je 26. oktobra 2017. godine održana treća po redu javna rasprava. Udruženje je uočilo niz nepravilnosti u prijedozima zakona, a koje bi, ukoliko ne budu uvaženi kritike Udruženja, moglo poslodavce i radnike, posebno one iz realnog sektora, dovesti u još težu situaciju.



Edin Ibrahimpašić, javna rasprava u Bihaću

"Logika stvari jeste da se oni koji najmanje primaju budu i najviše rasterećeni. Ovakav prijedlog zakona ne ide u tom smjeru", istaknuo je Edin Ibrahimpašić iz Udruženja poslodavaca FBiH.

Iz Agencije za unapređenje stranih investicija u BiH kažu da, prema informacijama koje dobijaju s terena, poslodavci u našoj zemlji imaju ogromne namete, što ugrožava ekonomski i privredni razvoj.

"U 90 posto slučajeva problemi s kojima se susreću domaći privrednici su isti kao i oni s kojima se susreću strani investitori. Uglavnom se to odnosi na preveliku široku poresku osnovicu, visoke doprinose", pojašnjava Goran Stanojević iz Agencije za unapređenje stranih investicija u BiH.

Takav odnos već je doveo do odljeva radne snage, manjeg zapošljavanja, niskih plata, a uvažavanjem amandmana Udruženja razvio bi se povoljniji poslovnog ambijenta i za poslodavce i za radnike.



Direktor UPFBiH Mladen Pandurević, javna rasprava u Bihaću

"To nije pitanje poslodavaca, to je pitanje opstanka države i društva", zaključio je direktor Udruženja poslodavaca FBiH Mladen Pandurević.

TEŠANJ I ZENICA

Prilika da se poslodavci sa područja ZE-DO kantona upoznaju sa amandmanima, kao i da daju konkretne prijedloge i sugestije, data je 31. oktobra 2017. godine kada su održane

javne rasprave u Tešnju i Zenici.



Javna rasprava u Tešnju

Analizom je zaključeno da zakoni ne idu u korist rasterećenja privrede, niti daju neutralan efekat.

"Predložena zakonska rješenje dovode do opterećenja rada i investiranja. Također, od strane Vlade došla su obećanja da će se povlastice koje su ukinute Zakonom o porezu na dobit biti vraćene novim zakonskim rješenjima, međutim to nije urađeno. Mi tražimo da se izmjenom zakona vrate politički izvoznicima u smislu oslobođanja poreza na dobit, odnosno investiranja kompanija u novu opremu i zapošljavanje", kazao je Zlatan Dedić, ispred Udruženja poslodavaca FBiH.



Javna rasprava u Zenici

Učesnici javne rasprave su istakli da su predložena zakonska rješenja lošija od postojećih, te da država ne stvara uslove za povećanje konkurentnosti, a samim tim i povećanje zaposlenosti i potrošnja, a što bi omogućilo veće punjenje budžeta i vanbudžetskih fondova. Svoje primjedbe uputit će Udruženju poslodavaca FBiH koje će ih uvrstiti u amandmane.

TRAVNIK



U Travniku je 02. novembra 2017. godine održana šesta po redu javna rasprava o tekstovima nacrta federalnih zakona o porezu na dohodak i o doprinosima, te o Zakonu poreza na dobit.



Predsjednik Grupacije poslodavaca Srednjobosanskog kantona pri UPFBiH Kemal Čolak ističe da je stav poslodavaca sa toga područja da je potrebno doći do rezultata koji će biti prihvatljivi, kako za poslodavce, tako i za vlast i za radnike.

- Želimo da se uravnoteži odnos onoga što poslodavci izdvajaju, kroz poreze i doprinose. Danas smo raspravaljali o tri ključna zakona, s ciljem da se čim prije smanji siva ekonomija i crno tržište, te da se poveća zapošljavanje i investiranje. Poznato je to da, ako uzimate prevelike poreze, da će određeni poslovni subjekti pribjegavati sivoj ekonomiji i zapošljavanju na crno. Zbog toga je naš cilj da uravnotežimo situaciju na način da dobijemo optimalna izdvajanja po svim osnovama - kazao je Čolak.



Na javnoj raspravi je ocijenjeno da nacrti zakona o porezu na dohodak, te zakona o doprinosima ne dovode do rasterećenja privrede i poslodavaca. Zbog prevelikih opterećenja nisu u situaciji povećati plaće

radnicima, što dovodi do odlaska radne snage van granica Bosne i Hercegovine, ističu poslodavci.

Trenutno poslovno okruženje djeluje destimativno na privčanje novih i održavanje postojećih investicija i za poslovanje općenito, a predložena zakonska rješenja su nepovoljnija od postojećih.

ŠIROKI BRIJEG I MOSTAR

U prostorijama FEAL-a u Širokom Brijegu i Privredne komore FBiH, ured Mostar, održane su 07. novembra 2017. godine javne rasprave.



Javna rasprava u Širokom Brijegu

"Pokušavamo na bazi argumenata da dokažemo Vladi Federacije BiH da treba napraviti rasterećenje privrede, te da ispunи obavezu koju je preuzela Reformskom agendom. Tražimo rješenja koja će dovesti do toga da radnici imaju više, time i više troše, da kreiraju nova radna mjesta, da se više pune budžet i vanbudžetski fondovi. Tražimo da se

vrate porezne olakšice. Nemamo ništa protiv da se proširi osnovica, da nema neoporezivih davanja, ali stopa mora biti manja", kazao je direktor Udruženja Mladen Pandurević.



Što se tiče Zakona o porezu na dobit, Pandurević je kazao kako se od predлагаča Zakona traži smanjenje stope poreza na dobit sa deset na osam posto te vraćanje određenih poreznih olakšica temeljem izvoza, investicija i zaposljavanja invalida.

"Pritiskom MMF-a ukinut je dobar dio povlastica za poslodavce. Posljedica toga je da vlade pune budžete i hvale se time, a smanjuju se drugi makroekonomski pokazatelji. Mi kažemo, omogućite nam poreske olakšice koje



Javna rasprava u Mostaru

postoje i u drugim zemljama, da nam se vrati poreska olakšica kod reinvestiranja", zaključio je Mladen Pandurević.



Direktor UPFBiH Mladen Pandurević i direktor Sektora za ekonomski i pravne poslove u Privrednoj komori FBiH Željko Raguž

Direktor Sektora za ekonomski i pravne poslove u Privrednoj komori FBiH Željko Raguž naglasio je da je Vlada FBiH u Nacrtu zakona o porezu na dohodak predložila uvođenje oporezivanja dividendi, prihoda od kapitalne dobiti, pa čak i kamata na štednju u bankama, što, po Raguževim riječima, nisu dobra rješenja.

Raguž je naveo kako u drugom bh. entitetu ne postoji oporezivanje dividende, kao ni porez na kamatu, te da bi oporezivanje tih prihoda moglo prouzročiti prebacivanje sjedišta kompanija iz Federacije BiH u Republiku Srpsku.

"Predloženi zakoni destimuliraju štednju, destimuliraju investicije, a uvođenje oporezivanja dividendi negativno bi djelovalo na i onako zamrlo tržište kapitala", poručio je

Raguž.

GORAŽDE



Udruženje poslodavaca FBiH, zajedno sa partnerskim institucijama, organiziralo je u Goraždu 09. novembra 2017. godine javnu raspravu o Nacrtu zakona o porezu na dohodak, Nacrtu zakona o doprinosima i Zakona o porezu na dobit FBiH.

„Prilikom analize zakona angažovali smo profesore sa Ekonomskog fakulteta UNSA, a naša namjera je da u ovih deset javnih rasprava, u direktnom razgovoru sa poslodavcima, prezentujemo amandmane Udruženja na pomenute zakone, te dodamo eventualne sugestije i kao takve ponudimo Vladi FBiH i parlamentarcima na usvajanje. Poslodavci su izrazili jednodušnu podršku našim prijedlozima", istekao je direktor Udruženja poslodavaca FBiH Mladen Pandurević.

U Udruženju poslodavaca FBiH stava su da Zakon o porezu na dobit kojim su ukinute porezne olakšice poslodavcima, ima negativan efekt na reinvestiranje i otvaranje novih radnih mesta te da će predloženi nacrti Zakona o porezu na dohodak i Zakona o doprinosima dodatno opteretiti realni sektor. Smatraju kako treba ponuditi rješenja koja će dovesti do rasterećenja privrede.



"Oni koji imaju plate oko 600 maraka mjesečno će plaćati 90 KM više, granična plata je 1.150 maraka, a što je plata viša više se dobija, što je plata niža više se uzima, odnosno više se gubi. To se mora promijeniti. Druga stvar, u Zakonu o porezu na dohodak tražimo da se uvedu tri stope, jako je bitno da se podigne na 1.000 KM neoporezivi dio jer ljudi koji imaju platu do 1.000 KM teško da mogu nešto da uštede kada će sve što zarade plasirati u potrošnju, na to će se plaćati porez, više će se kupovati i otvarat će se nova radna mesta", kaže Pandurević.

Predsjednik privredne komore BPK Dževad Terović ističe da u tom kantonu više od 55 posto ukupno zaposlenih radi u prerađivačkoj industriji, te da će ovi zakoni direktno uticati na realni sektor.

"Privreda se ne bi smjela opteretiti više niti jedan procent, bilo kakvim zakonima. Naprotiv, mi očekujemo od aktuelne Vlade, od Reformske agende, jer je u njoj to i predviđeno, da obaveze i teret poslodavaca i privrednika budu smanjenje po svim osnovama kako bi se ostavilo više prostora za povećanje lične potrošnje, odnosno ličnih dohodaka zaposlenih ljudi koji bi generisali potrošnju i razvijali druge kantonu vrlo važne segmente kao što je PIO, zdravstvo, obrazovanje, kultura i sport", smatra Terović.

SARAJEVO

Deseta, posljednja, javna rasprava o Nacrtu zakona o porezu na dohodak, Nacrtu zakona o doprinosima, kao i Zakona o porezu na dobit



održana je 13. novembra 2017. godine u Sarajevu.



Na raspravi je između ostalog rečeno da je potrebno pojednostaviti poslovanje kroz harmonizaciju entitetskih zakona zbog osiguranja jedinstvenog tržišnog prostora i konkurentnosti na nivou Bosne i Hercegovine.



Također, novim zakonima ne treba uvoditi porez na dividendu niti na kapitalnu dobit.

Direktor Sektora za ekonomski i pravni poslove Privredne komore FBiH Željko Raguž rekao je da bi uvođenje tih poreza značajno smanjilo stope profita i demotiviralo investitore da ulažu u BiH.

Dodao je da i stope doprinosa treba dodatno

smanjiti - s predloženih 33 posto u Nacrtu zakona o doprinosima, na 30,5 posto, kao i da treba uvesti tri stope poreza na dohodak od 10, 15 i 20 posto.



Direktor Udruženja poslodavaca FBiH Mladen Pandurević kazao je da je Udruženje zajedno sa partnerima stava da predloženi zakoni o porezu na dohodak, o doprinosima i o porezu na dobit nisu dobri.



"Vlada će, ukoliko želi dobro ovoj državi, uvažiti većinu naših primjedbi, a ako ne želi to je već pitanje građana", naglasio je Pandurević.

Sastanak sa premijerom o Zakonu o štrajku i Zakonu o zaštiti na radu

Socijalni parterneri su na sjednici Ekonomsko-socijalnog vijeća FBiH i na sastancima u Ministarstvu rada i socijalne politike FBiH usaglasili odredbe Zakona o štrajku i Zakona o zaštiti na radu, međutim, pomenuti zakoni su upućeni u parlamentarnu proceduru u izmijenjenom obliku, odnosno, u obliku koji nisu podržali socijalni partneri.



novembra 2017. godine, a prisustvovali su mu predsjednik i direktor Udruženja Adnan Smailbegović i Mladen Pandurević.

Predstavnici Udruženja su ukazali na primjedbe koje nisu unešene u nacrte zakona, a koje su podržane od strane članova Ekonomsko-socijalnog vijeća FBiH. Zaključeno je da će pomenuti zakoni biti vraćeni na Ekonomsko-socijalno vijeće FBiH te da će socijalni parteri održati sastanak kako bi se konačno usaglasili tekstovi zakona.

Udruženje poslodavaca FBiH je više puta upozoravalo Vladu da je postala praksa da se zakoni koji su usagrađeni od strane socijalnih partnera i koji su dobili saglasnost članova ESV-a upute u parlamentarnu proceduru u izmijenjenom obliku, što u konačnici utiče na kvalitet Zakona. Stoga je zatražen sastanak sa premijerom Vlade FBiH Fadilom Novalićem.

Sastanak sa premijerom održan je 02.

Inicijativom Udruženja poslodavaca FBiH izmijenjena sporna odredba koja definiše vrijeme snabdijevanja poslovnih objekata u Kantonu Sarajevo

Na inicijativu Udruženja poslodavaca FBiH izmijenjen je sporni član Zakona o uređenju saobraćaja na području Kantona Sarajevo koji definiše vrijeme snabdijevanja poslovnih subjekata.



Na jučerašnjoj (15.11.2017. godine) sjednici Skupštine Kantona Sarajevo usvojen je Prijedlog zakona o izmjenama i dopunama Zakona o uređuju saobraćaja na području Kantona Sarajevo.

Naime, poslodavci su zahtjevali izmjenu Člana 40. stavka 1. kojim je snabdijevanje poslovnih objekata koji se nalaze uz saobraćajnice dozvoljeno **do sedam sati za tekući dan** za sve objekte koji nemaju obezbjeden poseban prostor namjenjen za zaustavljanje dostavnih vozila, jer se pomenutim članom ugrožava profitabilnost i konkurentnost proizvođača/dostvaljača.

Mnoge kompanije i dostvaljači nisu u mogućnosti dostaviti robu do naznačenog

vremena, što je za posljedicu imalo pad prometa i privredne aktivnosti, a izvršioci zakona više puta dnevno su kažnjivali dostavljače koji su poslije naznačenog vremena dostavljaju robu, što je proizvodilo gubitke kompanijama.

Uredba je bila neprovodljiva jer mnogim firmama, niti dobavljačima radno vrijeme ne počinje prije sedam sati ujutro, a nije uređeno ni pitanje hitne dostave, te je na insistiranje Udruženja poslodavaca FBiH ovaj član izmijenjen. Izmjenom se odobrava snabdijevanje poslovnih subjekata na području Općine Stari Grad i Centar u terminima od: **00:00-07:00, 09:30-11:30, 17:30-19:30 sati.** Također, snabdijevanje poslovnih objekata na području Kantona Sarajevo koji se nalaze izvan područja iz Općine Stari Grad i Centar i koji se ne nalaze u pješačkoj zoni i ulicama zabranjenim za saobraćaj, vrši se tokom cijelog dana u skladu sa odredbama ZOSS-a, a snabdijevanje objekata koji se nalaze u pješačkim zonama vrši se do 09:00 sati za tekući dan, uz odobrenje koje izdaje Ministarstvo ili ako saobraćajnim znakom nije drugačije regulisano.

Sastanak predstavnika UPFBiH i potpredsjednice FBiH o problemu plasmana hemijskih proizvoda u RS



Na sastanku održanom 08. novembra 2017. godine u kabinetu potpredsjednice Federacije BiH Melike Mahmutbegović s predstavnicima Udruženja poslodavaca u FBiH i pojedinih hemijskih proizvođača iz FBiH, zaključeno je da u rješavanje problema onemogućavanja plasiranja hemijskih proizvoda iz Federacije u Republiku Srpsku treba uključiti i predstavnike dvaju entitetskih vlada te međunarodne zajednice. Potrebno je organizirati sastanak na koji će biti pozvani i ovi dodatni subjekti, osim današnjih učesnika, rečeno je.

Uporedno treba insistirati da federalni zakon o hemikalijama, koji je u proceduri, ugleda svjetlo dana što prije. Federacija BiH još izbjegava da na potez iz Republike Srpske odgovori kontramjerama, kao i da se obrati Ustavnom суду zbog kršenja ustavnih načela o slobodnom međuentitetskom protoku roba, navedeno je također.

Sastanak u kabinetu potpredsjednice Mahmutbegović održan je na inicijativu Udruženja poslodavaca u Federaciji BiH. Poslodavci su naveli da se susreću s problemima vezanim za zabranu plasmana hemijskih proizvoda iz Federacije na područje Republike Srpske. Da bi proizvođači hemijskih proizvoda mogli imati proizvodnu paletu na području RS-a, moraju biti i registrirani tamo, odnosno u nadležnom ministarstvu. Donošenjem zakonskih i drugih podzakonskih akata u Republici Srpskoj, kao što je Pravilnik o kriterijima za stavljanje deterdženata na tržište, onemogućen je nesmetan tok roba i kapitala između Federacije BiH i RS-a, što je suprotno Ustavu Bosne i Hercegovine, navelo je još Udruženje poslodavaca FBiH.



U Republici Srpskoj je septembra prošle godine Republička uprava za inspekcijske poslove obavijestila sve trgovačke centre da u

su u tom entitetu na snazi propisi usklađeni u većoj mjeri s propisima Evropske unije, a odnose se na oblast hemikalija/biocida i predmeta široke potrošnje među kojima su sredstva za održavanje čistoće.

Budući da su u Federaciji BiH propisi

neusklađeni, navedeno je također, postoji mogućnost da se na tržištu RS-a nađu proizvodi koji ne ispunjavaju uvjete važećih propisa. Trgovcima je pritom preporučeno da kod narudžbi roba obrate pažnju na usklađenost proizvoda s propisima Republike Srpske.

Siva ekonomija čini 25 posto BDP-a BiH

Prema istraživanju agencije Ipsos siva ekonomija u BiH čini čak 25,5 posto bruto domaćeg proizvoda. Upravo o ovom problemu govorio je Arthur Laffer, jedan od najpoznatijih svjetskih stručnjaka za političku ekonomiju.

Bosna i Hercegovina kao zemlja u kojoj siva ekonomija čini četvrtinu bruto domaćeg proizvoda treba mijenjati poreznu politiku. Ali ne na način na koji to sada radi, povećavanjem poreza - mišljenja je Arthur Laffer. Dodaje kako smanjenje poreznog opterećenja poslodavaca može smanjiti obim sive ekonomije i povećati broj zaposlenih.

"Ako mislite da se grčki scenario ne može desiti vama, varate se. Ali i ako mislite da san pripada samo Irskoj i Švicarskoj, opet ste u krivu. Bosna i Hercegovina može odletjeti na mjesec ukoliko tako odluči, ali isto tako može potonuti na dno okeana. Izbor ja na vama. I

dodaću, ljudi zaslužuju vladu koju odaberu. Ako vam se sviđa ono što ste dobili zadržite ga, a ako vam se ne sviđa - mijenjajte stvari", rekao je Arthur Laffer.

Da stvari treba mijenjati misle i poslodavci. Predsjednik Udruženja poslodavaca FBiH kaže kako povećanje stopa poreza vodi u sivu ekonomiju. Najveći problem poslodavcima predstavlja visok porez na rad, a u skladu sa tim imaju i svoje prijedloge za promjenu zakonske regulative.

"Da se definitivno smanje porezi na rad. Da se sredstva uzmu iz nekih drugih izvora, kako bi se izmirila ta sredstva. Mi smo iznijeli nekoliko prijedloga, a država mora donijeti zakonsku regulativu. Porezi na imovinu su jako niski u BiH, koncesija skoro da i nema, PDV je takođe relativno nizak u odnosu na zemlje u okruženju. Dakle, ima tu prostora da

se napravi jedan optimalan balans", kazao je Adnan Smailbegović, predsjednik Udruženja poslodavaca FBiH.

Pri povećanju stope poreza, Bosna i Hercegovina se ne treba ugledati na ekonomski uspješne zemlje, već na mjere tih zemalja iz vremena kada to nisu bile - jer su tada strateški radile na ojačavanju ekonomije - smatra profesor Laffer. Profesor i dekan Ekonomskog fakulteta u Sarajevu, Kemal Kozarić, dodaje:

"Porez na plate od 70 posto - to je neodrživo. To ubija motivaciju da se otvaraju nova radna mesta, da se bude aktivniji, da se bude

prisutniji. I to, samim tim, ima direktni utjecaj na pad budžetskih prihoda. Što veći poreski obuhvat, više poreza i naravno da tada država može da vrši svoju funkciju, a to je da plaća profesore, policajce, ljekare - a ne samo administraciju."

Prema istraživanju Ipsos-a, većina građana BiH sivu ekonomiju povezuje sa neprijavljinjem radnika, neregistrovanjem prodajnih transakcija te skrivanjem prihoda preduzeća. Isto istraživanje pokazalo je da gotovo 90 posto ispitanika smatra da jačanje sive ekonomije smanjuje mogućnosti države da građanima pruži javne usluge, ograničavajući tako i ekonomski rast zemlje.

BiH pala na 86. mjesto prema izvještaju 'Doing Business'

Bosna i Hercegovina je u najnovijem godišnjem izvještaju Svjetske banke 'Doing Business', zauzela 86. mjesto među ukupno 190 zemalja svijeta što je pad za sedam pozicija.

Što se tiče naše regije, najbolje je plasirana Makedonija i to na 11. poziciju, Kosovo je na 40. mjestu, Crna Gora na 42., a Srbija na 43. mjestu, dok je Hrvatska na 51. mjestu. Inače, na samom vrhu su Novi Zeland, Singapur i Danska.

Dvije ekonomije, Kosova i Uzbekistana, ističu se kao one koje su najviše napredovale.

Regija i dalje pokazuje slabiji učinak u oblasti građevinskih dozvola i priključaka na električnu energiju. U regiji je prosječno potrebno 168 dana za dobivanje građevinske dozvole, u poređenju sa 158 dana globalno. A poduzetniku u regiji trebaju 144 dana da se priključi na električnu energiju, dok je globalni prosjek 92 dana.

Ministarstvo trgovine FBiH podržalo inicijativu Udruženja vezano za problem oznaka cijena robe

Direktor Udruženja poslodavaca FBiH Mladen Pandurević održao je sastanak sa ministrom trgovine FBiH Zlatanom Vujanovićem i saradnicima vezano za problem oznaka cijena robe. Sastanak je održan 07. novembra 2017. godine u Mostaru, a prisustvovali su i Edin Ibrahimović iz kompanije Bingo, te Alma Aščić i Kristina čosić iz dm drogerie makrt BiH.



Udruženje poslodavaca FBiH je uputilo inicijativu za donošenje Pravilnika o izmjenama i dopunama Pravilnika o obliku, sadržaju i načinu vođenja trgovačke knjige.

Naime, članom 8. stavom 2. i 3. Pravilnika koji je bio na snazi do 2015. godine, bila je propisana obaveza da se uz oznaku cijene robe označi redni broj iz trgovačke knjige, **ali uz izuzetak za trgovce kod kojih se na proizvodu nalazi bar code ili druga oznaka na osnovu koje se istaknuta cijena može povezati sa prijemnim listom, odnosno zapisnikom o**

promjeni cijena.

Međutim, 2015. godine donesen je novi Pravilnik o obliku, sadržaju i načinu vođenja trgovačke knjige u FBiH u kojem su **brisani pomenuti stavovi. Na ovaj način se nameće obaveza poslodavcu da bez obzira na činjenicu da se na proizvodu nalazi bar code ili druga oznaka na osnovu koje se istaknuta cijena može povezati sa prijemnim listom, odnosno zapisnikom, ipak mora označiti redni broj iz trgovačke knjige uz oznaku cijene robe.**

Inicijativa je upućena s ciljem smanjenja cijena poslovanja, te bi njegovo usvajanje doprinijelo povećanju konkurentnosti koje bi uticalo na smanjenje cijena pojedinih proizvoda.

Inicijativu Udruženja možete pročitati [OVDJE](#).

Ministar Vujanović naglašava da je ovom ministarstvu od izuzetne važnosti mišljenje poslodavaca, te zahvalio Udruženju na kvalitetnoj i korektnoj saradnji. Dodao je da je inicijativa Udruženja opravdana te da će Ministarstvo reagovati kako bi se izmijenio sporni član.

Promocija dualnog obrazovanja



Dana 10. novembra 2017. godine održan je sastanak između Udruženje poslodavaca u FBiH i JU „Služba za zapošljavanje Kantona Sarajevo“ koji bi zajednički trebali aplicirati na pilot projekat dualnog obrazovanja Međunarodne organizacije rada (ILO).

Sastanku su prisustvovali i predstavnici Ministarstva za obrazovanje nauku i mlade, predstavnici općina Centar, Stari Grad, Novi Grad, Vogošća, Ilijaš, Trnovo i Ilidža te predstavnici Srednjoškolskog centra Vogošća i Srednje škole za saobraćaj i komunikacije, koji bi, ukoliko dođe do realizacije projekta, bili u svojstvu partnera.

Prisutni su razgovarali o načinima dualnog obrazovanja, koji je dio srednjeg obrazovanja u kome se kroz teorijsku nastavu i vježbe u školi, kao i učenje kroz rad kod poslodavaca, stiču, usavršavaju i izgrađuju znanja, vještine,

sposobnosti i kompetencije u skladu sa planom i programom nastave.

Dualni model stručnog obrazovanja je sistem edukacije u kojem učenici stručnih škola pohađaju dio nastave redovno u školi, dok ostatak vremena provode na stručnoj praksi, koja se odvija u različitim kompanijama.

Ovakav sistem obrazovanja postoji u razvijenim zemljama. Najuspešniji modeli su razvijeni u Njemačkoj, Austriji i Švicarskoj, a ovim se rješava problem nedostatka stručne radne snage.



„Učenje kroz rad“ je organizovan proces tokom kojeg učenici, pod rukovodstvom i nadzorom u realnom radnom okruženju kod poslodavaca, stiču kompetencije neophodne za efikasan i produktivan rad u određenom zanimanju.

Principi dualnog obrazovanja su jedanki uslovi za sve, usklađenost sa potrebama poslodavaca i tržišta rada, pristup različitim područijima rada u okviru istog nivoa obrazovanja i ka višim nivoima obrazovanja, sloboda izbora zanimanja, te partnerstvo između svih relevantnih organa.



Procjena je da proces izrade projekta i ostvarivanja njegovih ciljeva nije lagan, te da treba prilagodiiti niz elemenata kao što je prilagođavanje nastavnih planova potrebama dualnog obrazovanja.

Potrebno je osiguranje promocije ovog obrazovanja kroz specijalizirane urede i šaltere, edukacija trenera, opremanje kabineta prema vrsti obuke itd.

Prvenstveno je planirana edukacija trenera za model dualnog obrazovanja, kao i edukacija nastavnika praktične obuke.

Ukoliko aplikacija na ovaj projekat bude prihvaćena, trajao bi 12 mjeseci i trebalo bi da pokaže kako se na brz i efikasan način može osigurati funkcionisanje dualnog obrazovanja.

Nakon toga, bili bi poznati efekti ovakve vrste stručnog obrazovanja i njegova mogućnost implementiranja u obrazovni sistem, što ima za cilj obezbjeđivanje uslova za sticanje, usavršavanje i razvoj kompetencija u odnosu na potrebe tržišta rada, s obzirom da je jedan od velikih problema sa kojima se poslodavci suočavaju „neatraktivnost“ zanimanja, na šta ukazuju upisne statistike po kojim se broj đaka za određena zanimanja smanjuje iz godine u godinu.

Ministarstvo zdravstva FBiH podržalo inicijativu Udruženja poslodavaca za izmjenu Zakona o zdravstvenom osiguranju FBiH



Udruženje poslodavaca FBiH je sredinom tekuće godine uputilo Ministarstvu zdravstva FBiH inicijativu za izmjenu Zakona o zdravstvenom osiguranju FBiH, a ukazano je i na problem zabrane plasmana proizvoda iz FBiH na područje RS-a. Shodno tome, 25. oktobra 2017. godine u prostorijama Udruženja poslodavaca FBiH održan je sastanak između predstavnika Ministarstva, Udruženja poslodavaca FBiH i predstavnika kompanija Bingo, Dita i EZ Busovača.

Direktor Udruženja poslodavaca FBiH Mladen Pandurević prezentirao je primjedbe na članove 56., 58. i 81. Zakona o zdravstvenom osiguranju. Primjedbe se odnose na smanjenje broja dana u kojem poslodavaca ima obavezu naknade plaće za vrijeme bolovanja i smanjenje broja dana u kojem poslodavac ima

obavezu naknade plaće zbog povreda na radu ili oboljena od profesionalne bolesti, a prijedlog Udruženja je i da se briše Član 81. koji definiše da su pravna ili fizička lica obavezna da se reosiguraju radi rizika.

Inicijativu Udruženja sa obrazloženjima možete pročitati [OVDJE](#).

Ministarstvo je ocijenilo primjedbe Udruženja opravdanim, te su saglasni da je vrijeme od 42 dana u kojem poslodavac ima obavezu naknade plaće za vrijeme bolovanja predugo i da ga treba smanjiti, a da Član 58. i 81. treba riješiti na način da se institut povrede na poslu veže za odgovornost radnika, odnosno poslodavca, te da finansiranje zavisi od odgovornosti za dati slučaj.

Zaključeno je da će Ministarstvo, u skladu sa primjedbama Udruženja, pokrenuti inicijativu za izmjenu Zakona, te da očekuju podršku od ostalih aktera za izmjenu Zakona.

Održana 23. Sjednica UO Udruženja poslodavaca KS

Članovi Udruženja poslodavaca KS su 14. novembra 2017. godine u prostorijama Udruženja poslodavaca FBiH održali 23. redovnu sjednicu Upravnog odbora. Sjednici su također prisustvovali Mladen Pandurević i Zlatan Dedić, ispred federalnog Udruženja.



Nakon usvajanja Zapisnika sa prošle sjednice UO, članovi su usvojili i Dnevni red za predstojeću IV izbornu skupštinu UPKS koja će se održati 12. decembra 2017. godine u Hotelu Bosna sa početkom od 12:00 sati.

Predloženo je da se pristupi izradi novog Statuta koji će efikasnije urediti rad Udruženja. Zadužena je Stručna služba Udruženja poslodavaca FBiH da pripremi svu potrebnu dokumentaciju za IV izbornu skupštinu UPKS, a Komisija za pripremu skupštine će se izjasniti o materijalima i izboru članova Upravnog odbora.

Nadalje, predsjednik UPKS Muhamed Pilav

upoznao je članove UO o spornim odredbama Zakona o izmjenama i dopunama Zakona o komunalnim djelatnostima KS, kao i o Zakonu o uređenju saobraćaja KS.



Muhamed Pilav (MS&WOODS) i Nedžad Šadić (KLAS)

Naime, u djelu Zakona o komunalnim djelatnostima KS Poglavlje III – Osnove i mjerila za određivanje komunalne naknade, utvrđuje se način i visina naknade za odvoz smeća iz preduzeća. Primjenom ovih odredbi poslodavci iz KS-a smatraju da su višestruko oštećeni. Kako navode:

- Ovim je naknada za odvoz smeća iz firmi povećana i do deset puta
- Na ovaj način je usluga koju vrši KJP RAD kategorisana kao porez, a ne kao usluga
- Sve firme iz metaloprerađivačke i drvne djelatnosti prodaju ili koriste svoj otpad.

Također, sporni član Zakona o uređenju

saobraćaja KS glasi: „Snadbijevanje poslovnih objekata koji se nalaze uz saobraćajnice vrši se od sedam sati za tekući dan za sve objekte koji nemaju obezbjeđen poseban prostor namjenjen za zaustavljanje dostavnih vozila".



Ovom odredbom Zakona ugrožena je profitabilnost i konkurentnost proizvođača/dostavljača, jer mnoge kompanije i dostavljači nisu u mogućnosti dostaviti robu do naznačenog vremena, što za posljedicu može imati pad prometa i pad privredne aktivnosti. Izvršioc zakona kažnjavaju dostavljače koji poslje naznačenog vremena dostavljaju robu, što ponovo proizvodi gubitke kompanijama.

Uredba je neprovodljiva jer mnogim firmama, niti dobavljačima radno vrijeme ne počinje prije sedam sati ujutro, a nije uređeno ni pitanje hitne dostave, te su poslodavci mišljenja da je potrebno ili brisati stav 1. pomenog zakona ili ga prilagoditi realnim mogućnostima za dostavu robe od strane proizvođača/dostavljača

Zadužuje se Stručna služba UP FBiH da

inicijative za izmjenu pomenutih zakona uputi zastupnicima u klubovima naroda Skupštine Kantona Sarajevo, premijeru Vlade KS i predsjedavajućoj Ekonomsko-socijalnog vijeća za teritorij KS, te će Stručna služba



UPFBiH članovima UO pismenim putem dostaviti informaciju o izvršenom zadatku.

Na sjednici se raspravljalo i o inicijativi Tomislava Gruzelja, člana ekspertne komisije za uvođenje dualnog obrazovanja u Kantonu Sarajevo.

Članovi UO su raspravljali o problemu obrazovanja stručnog skadra i neusklađenosti obrazovnog sistema i potreba tržišta rada, te su podržali napore Ministarstva za obrazovanje, nauku i mlade KS za uvođenje dualnog obrazovanja u Kantonu Sarajevu, kao i inicijativu Tomislava Grizelja u smislu da se prioriteti za određena zanimanja daju prilikom upisnih politika.

Kompanija Mann+Hummel BA ostvaruje rekordnu proizvodnju u svom pogonu u BiH

U septembru i oktobru kompanija bilježi **rekordnu proizvodnju** od oko dva miliona filtera mjesečno.

Zaposleno je oko 630 radnika. Na kraju godine očekuje se rast vrijednosti prodaje (prometa) za ca. 20 posto i proizvodnje za ca. 8 posto u odnosu na prošlu godinu.

Ova godina će biti rekordna i po ulaganjima od oko četiri miliona KM.

Osim toga, ova kompanija dodatno širi svoje poslovanje u BiH, jer je kupila zemljište

od 9.300 m² sa starim objektom od 4500 m² u Bukvi, s namjerom da gradi Logistički centar.

"Prisustvo Mann Hummela ovdje je višestruko značajno ne samo za našu fabriku nego za širi privredni ambijent koji jača iz dana u dan zahvaljujući novim iskustvima koja stičemo kroz stalne programe edukacija i usavršavanja u okviru našeg koncerna", rekao je **Mahmut Galijašević**, generalni direktor firme Mann Hummel BA.

Kompanija je prošle godine imala prihode od **57,5 miliona maraka**.

Otvoren pogon Koteksa u Zavidovićima

Kompanija Koteks iz Tešnja otvorila je podružnicu u Zavidovićima, u nekadašnjem krivajinom pogonu „Stoličara“.

autoindustrije i industrije namještaja, na prostoru od skoro 2.500 kvadrata, koji je opremljen savremenim mašinama.

U prvoj fazi je zaposleno 50-ak radnika, a još najmanje 50 radnih mesta bit će osigurano do kraja godine.

Konačan plan je, prema riječima Harisa Sejdica iz Koteksa Tešanj, popunjavanje kapaciteta od 250 radnih mesta. Kompletna proizvodnja ide na evrsko tržište.



U pitanju je tekstilni proizvodni pogon

Energoinvest: Novi posao u Tanzaniji vrijedan 53 miliona dolara

Energoinvest d.d. Sarajevo je zvanično obaviješten od Elektroprivrede Tanzanije o izboru za najboljeg ponuđača i dodjeli ugovora za izgradnju trafostanica u vrijednosti višoj od 53 miliona američkih dolara.

Energoinvest će ovaj posao raditi kao nosilac i lider konzorcija u saradnji sa indijskom firmom EMC, odgovornom za dio građevinskih radova.

To je već drugi projekt koji je, pored projekta izgradnje 400 kV dalekovodne mreže u vrijednosti 39 miliona USD, u ovoj godini Energoinvest dobio od Elektroprivrede

Tanzanije, tako da će u narednom periodu, samo u Tanzaniji Energoinvest realizovati poslove u vrijednosti od 92 miliona dolara.

Posao finansira African Development Fund (ADF) i Japan International Cooperation Agency (JICA), a investitor je Elektroprivreda Tanzanije (TANESCO).

Ugovor će se početi realizirati nakon razmjene potpisanih ugovornih dokumenta, što se očekuje u narednih nekoliko nedjelja.

Prevent BH gradi dvije hale i zapošljava više od 500 ljudi - Finansijski partner u investiciji Austrijska razvojna banka

Austrijska razvojna banka i kompanija Prevent BH potpisali su ugovor kojim će ova banka finansijski pomoći nove investicije ove kompanije u BiH.

Ovo je prvi ulazak Austrijske razvojne banke u BiH, a partner u ovoj investiciji će biti Raiffeisen banka.

prepoznala značaj BiH kao mjesta gdje želi ulagati i zajedno sa privatnim sektorom razvijati bh. privredu, te izabrala Prevent grupaciju kao strateškog partnera za takvu misiju. Potpisivanjem ugovora, stvorili smo preduvjete za dodatno širenje Prevent grupacije i otvaranje preko 500 novih radnih mjeseta na različitim lokacijama u BiH - izjavio je Haris Rahman, predsjednik Uprave Prevent BH.

- Drago nam je da je Austrijska razvojna banka

ArcelorMittal ima planove u Zenici za narednih 15 godina - Najavljeni zajednička ulaganja sa Gradskom upravom

-Za stanovnike Zenice život bez željezare nema smisla - rekao je Nair, najavivši da ova kompanija već ima poslovne planove za narednih 15 godina, zajednička ulaganja Grada i kompanije u pogon Energetike i pokretanje novih projekata u pogonu Visoke peći.

Premjer Zeničko-dobojskog kantona Miralem Galijašević izrazio je zadovoljstvo napredovanjem kompanije, te naglasio da ga posebno raduju posljednja tri projekta koja se odnose na unapređenje zaštite okoliša u Zenici.

Premijer Vlade FBiH naglasio je ekonomski značaj ArcelorMittala.

– Osim nesumnjivog ekonomskog značaja, kao jednog među pet najvećih izvoznika u Federaciji BiH, poslovanje ArcelorMittala u Zenici ima i veliki politički značaj. Činjenica da se u Prijedoru topi ruda za zeničku kompaniju, na određen način povezuje dva entiteta, a globalni položaj ArcelorMittala povezuje Bosnu i Hercegovinu sa brojnim zemljama svijeta, prije svega sa Indijom - kazao je Novalić.

Fojnički MS&WOOD dobitnik dvije prestižne nagrade German Design Award 2018

Bosanskohercegovačka industrija namještaja "MS&WOOD" (Majstori i drvo) iz Fojnice dobitnik je dvije nagrade German Design Award za 2018. godinu. Nagrada "Winner" u kategoriji Excellent Product Design Furniture, dizajnera Ade Avdagića dodijeljena je za komodu iz kolekcije Primum, dok je nagrada "Honorable Mention" u istoj kategoriji dizajnerice Nataše Perković pripala stolici iz kolekcije Elle.

"Zahvalan sam našim timovima koji su

vrijedno radili na realizaciji ovog složenog projekta. Ovo je do sada najznačajnija međunarodna potvrda našeg uspjeha. Objekcije su idealan spoj umijeća vrhunskih majstora i sjajnih bosanskih dizajnera, i drago nam je da to prepoznaju žiriji natjecanja u oblasti produkt designa čiji kriteriji su među najvišim u Evropi i svijetu", izjavio je Muhamed Pilav vlasnik i direktor kompanije MS&WOOD.



NoLimit Premium

Premium korisnici zaslužuju **premium** paket...

Neograničen mobilni internet *

Neograničeni razgovori *

Neograničeno slanje SMS poruka prema svim mrežama u BiH *

Svi telefoni iz ponude BH Telekoma za samo 1 KM

Mjesečna pretplata iznosi 170 KM sa PDV.

* korištenje po fer principu (**30 GB** mobilnog interneta po maksimalno mogućoj brzini prijenosa, **5.000 minuta** razgovora unutar mobilne i fiksne mreže BH Telekoma, **1.000 minuta** razgovora prema drugim fiksnim i mobilnim mrežama u BiH, **1000 SMS poruka** prema mobilnoj i fiksnoj mreži BH Telekoma, kao i drugim mobilnim mrežama u BiH).



Dajemo više
www.bhtelecom.ba





UDRUŽENJE POSLODAVACA FBiH

MULA MUSTAFE BAŠESKIJE 12/3, 71 000 SARAJEVO

TEL: 00 387 264 830

FAX: 00 387 33 552 461

MAIL: info@upfbih.ba

WEB: www.upfbih.ba